

四庫全書

史部

# 欽定四庫全書

史部

平定朔漢方畧卷二十一

詳校官編修<sub>臣</sub>曹振鏞

編修<sub>臣</sub>裴謙覆勘

總校官進士<sub>臣</sub>繆琪

校對官中書<sub>臣</sub>朱圻

謄錄監生<sub>臣</sub>曹勳祖

欽定四庫全書

聖祖仁皇帝親征平定朔漢方略卷二十

二月己丑

命黑龍江副都統喀特虎從軍黑龍江將軍薩卜素

奏言副都統喀特虎喇子二人俱告請願赴軍

中竭力以効犬馬之勞臣欲帶兩副都統出征

奏至得

旨喀特虎著從軍喇子著鎮守地方

辛卯

命更定出兵日期並增發偵探官兵

上諭內大臣國舅佟國維等曰噶爾丹為人狡詐未必  
不指西向東我大兵若於三月初十起行則四月  
二十五間方得至巴顏烏闌今不便待陝西兵中  
路行期宜改在三月初間西路費揚古兵行期亦  
改在二月望間著交欽天監選擇具奏至於喀倫  
地方偵探情形事屬緊要宜增派官兵發往侍郎

安布祿處駐劄俟厄魯特來時視其兵力仍前單弱即著擒勦倘力不相敵擇便退回星飛馳報爾等其集議之議曰

聖諭周詳俱應欽遵而行其派發喀倫官兵請於每旗派不出征之前鋒五名並不出征之王貝勒貝子公等屬下擇其人材壯健家道殷實護衛及新滿洲共派百名給以肥馬令其速赴安布祿處駐劄喀倫一同偵探俟大軍到日其護衛及

前鋒兵俱令撤回此事仍應檄將軍舒恕孫思克等知之奏上得

旨此發往喀倫官兵共派七十人足矣所派前鋒仍著於出征之前鋒內選派四十名再將出征上三旗及王貝勒貝子公等情願効力之護衛人員內共派三十名護衛俱著乘自備馬匹前鋒兵著給上駟院及兵部馬各三匹計其口糧行裝給與駱駝負載伊等分內之馬匹輜重著隨大軍前去俟

大軍到喀倫仍各乘自備馬匹其帶往之駝馬可  
交上駟院兵部查收

諭從征人員愛護馬匹

上諭內大臣國舅佟國維等曰方今春令肥馬若被雨  
淋恐致倒斃著通行曉諭出兵人員及于成龍等  
預備油單中途如遇雨雪即以苫蓋

壬辰

命蒙古官兵預備于烏爾琿河聽用先是理藩院奏

言四子部落六鄂爾多斯兵俱派隨西路出征  
兩翁牛特兩喀喇沁兵已派輓中路米車不議  
外其兩烏朱穆秦兩蒿齊忒兩阿霸哈納爾兩  
阿霸孩兩蘇尼特十科爾沁兩扎魯特阿祿科  
爾沁兩巴林克西克騰敖漢奈曼兩土默特及  
喀爾喀羅卜臧貝勒等旗扎薩克王貝勒貝子  
公台吉等官兵應派在何路伏候

欽定得



旨俟出兵臨期傳諭衆扎薩克等酌率本旗官兵于  
各邊界預備來者帶往不來者聽之至是

上諭曰目今蒙古兵衆正當馬匹羸瘦之時可止其來  
會大軍著都統杜思噶爾理藩院章京達賴馳驛  
前往令蒙古王等將所屬兵丁內情願効力馬匹  
足供驅策者儘數派出駐烏爾揮河地方預備乘  
青草牧肥馬匹以待遣用杜思噶爾等宣諭畢可  
于喀倫內來赴軍前

定中西二路大軍起行日期欽天監奏二月三十日  
丙辰寅時中路大兵自京城起程大吉二月十  
八日甲辰巳時西路大兵自歸化城起程大吉  
奏

聞

上諭內大臣蘇爾達等曰中路大兵行期可定于二月  
三十日此選定日期著速檄大將軍費揚古知之  
命廢官中路坐塘効力兵部理藩院奏中路大兵例

應設驛自京城至獨石口請設四驛其間有額  
定驛馬不必增加外每驛用筆帖式一員撥什  
庫二名自獨石口外五六十里一驛約設六十  
驛每驛馬四十匹共需馬二千四百匹應于直  
隸山東河南三省捐助之馬京城大小官員捐  
助之馬兵部館所之馬內取一千九百匹兩阿  
霸垓兩阿霸哈納爾兩蘇尼特旗分內取馬五  
百匹安設至中路大兵到喀倫後沿喀倫迎西

路聯絡設十五驛所需馬三百匹亦取捐助之  
馬兵部館所之馬每驛安設二十匹如兩路大  
兵中間相隔遙遠驛或不足酌量增設中路大  
兵正站腰站俱兩驛合設筆帖式一員撥什庫  
二名扎薩克蒙古官一員兵十名其筆帖式取  
自各部院撥什庫取自八旗滿洲蒙古旗下其管  
理正站驛馬行止安設之事應撥理藩院兵部  
章京各二員腰站亦撥章京各一員前去至捐

助之馬無夫押送以四馬一夫筭共需夫四百  
名應檄直撫將附近僻地驛夫照數酌撥備帶  
口糧押送馬匹奏上得

旨此番出師諸物朕皆全備並無待後賫送之物飛  
馳之事亦少一驛設馬四十匹則太多况發直隸  
河南兩省驛馬人夫伊等亦甚勞苦着每驛用捐  
助馬二十匹部院章京筆帖式撥什庫調用將盡  
今設此驛有革職文官情願告請効力者甚多若

輦不習軍務可令伊等一驛兩三人坐塘効力報馬不足令自備馬匹馳報其口糧令自備人夫運送亦彼出力自効之事也併酌撥扎薩克蒙古內台吉章京兵丁監視馬匹如驛馬失盜被劫即依律治罪至草青後將蒙古之馬着該管台吉各自本旗酌帶赴驛協助傳報以此傳諭設驛地方衆扎薩克可也如此則驛務不致有悞而坐塘者亦大有裨益矣餘如議行

癸巳

諭安郡王馬爾渾等駐防歸化城遠偵聲息先是  
命安郡王馬爾渾輔國公來僖副都統雅圖率宣化  
府綠旗兵一千歸化城土默特兵二千往歸化  
城駐防至是馬爾渾等瀕行恭請

訓旨

上曰爾等往歸化城務揚軍威以示兵力強盛各處遠  
行偵探最為要緊爾等三人須同心効力不可于

事後但云我意原欲如此曾經言過彼此互相推諉王與公皆年幼未曾歷練凡事宜與雅圖商酌而行爾雅圖乃曉事之人不可推托王等至朕行在與歸化城相近此時正當用兵之際不必差人請安

甲午

命頒賜綿甲于從征將士時浙江等五省製造綿甲陸續解至京師



上命頒給從征將士復傳

諭曰此甲朕曾親試進退周旋毫無阻碍甚覺輕便  
此外更加以一層鐵葉一切烏鎗無有貫入之理  
此甲表裏皆係單層絲綿尚易透出或綴或布內  
外再加襯貼則益覺堅好矣甲背上亦照鐵甲式  
各書旗分佐領姓名綴之此皆動用正項錢糧特  
為製造不可棄擲所給之人記名存案

命加運軍糧以備虧耗

上諭總理運務于成龍等曰爾等所運軍糧係計日按口而備一路風吹日曝車軸動搖或致虧耗可于每石加米一斗運往如此則臨期支放庶不致缺少

大將軍伯費揚古自京起行赴歸化城增發火礮於西路先是以冲天礮三門神威礮十門景山製造子母礮二十四門江南礮五十五門發往大同以備西路兵之用至是

上諭兵部曰著於新造礮四十八門內選八門派每旗礮手一名作速增解大將軍費揚古軍中命開明口外來報聲息檄知將軍薩卜素等

上諭內大臣國舅佟國維等曰前令黑龍江寧古塔盛京立刻備兵各居其地者恐噶爾丹知我三路大兵進剿惶迫東行是以使之預備也今視口外來報情形亦有東行之狀著薩卜素立刻整備屬下兵馬遠設偵探如有用盛京寧古塔兵之處許彼

星速往召總轄調遣其左近蒙古亦當小心防備  
因薩卜素所居懸隔報京聲息不得聞知可將凡  
屬噶爾丹之事口外報文一一查出開明月日發  
與薩卜素使彼知之以便準備行事盛京寧古塔  
將軍處亦着遣檄知之

丁酉

命以所餘綿甲解右衛軍中先是曾以綿甲五千發  
給大將軍費揚古軍中至是

上諭內務府總管曰所餘綿甲內着取二千領交兵部解往右衛軍中

戊戌

命選侍衛章京為傳宣

上諭內大臣國舅佟國維等曰現在傳宣皆卑微之人重大事務不足差遣除平常小事差遣若輩外着每旗簡選賢明侍衛章京四員附御營預備如有緊急大事使持令箭以聽差遣其令箭交內府大

臣製造

已亥

勅獎策旺喇卜灘時策旺喇卜灘遣使囊素齋疏請  
安并貢方物又陳噶爾丹奸惡乞遣還回子歸已

上嘉之

賜以勅書

勅曰朕為萬國元后惟以率土乂安咸享樂利為心  
其能體朕覆載之懷敬順自持者朕必愛養教育

之其或違朕蕪容懷保之意不循分誼包藏禍心  
悖安和之理者朕必懲創匡正之此朕統御寰區  
為人君之大道也今爾策旺喇卜灘仍踐前好遣  
使請安貢獻方物不絕又以噶爾丹奸詐為所侵  
凌與爾有不共戴天之讐披瀝情實遣使囊素齎  
奏入告誠心求恤敬順可嘉朕為一統萬邦之主  
有不眷爾誠心效順之人乎查爾所奏回子之事  
今噶爾丹處雖無回子前來貿易此後或來朕必

交該部查明如爾所請發往朕嘉爾恭謹受爾貢  
獻爾尚永懷敬順朕將浡加恩賜焉昔噶爾丹擾  
我邳治猖獗橫行闌入烏闌布通之時朕遣偏師  
大敗之欲即窮追將盡殲矣而噶爾丹乃長跪于  
達賴喇嘛所遺威靈佛前而誓曰不敢復侵中華  
皇帝之喀爾喀與衆人民載書加印始免其誅滅  
而縱之朕向者殊不喜征誅今噶爾丹悖棄誓言  
戕我賚汝之使劫喀爾喀之人阻止班禪庫圖克



圖之來今又至巴顏烏闌動搖我人民內懷詭詐  
欲行禍亂其跡顯然朕為一統萬邦之主若此擾  
我昇平之人何得不加創艾是以發三路大軍誅  
討凡罪皆在噶爾丹他無與也但三路大軍甚衆  
聲靈赫濯恐邊外之民不無震驚爾其遍諭爾之  
屬衆以至土魯番諸處各令照常安居勿致驚潰  
特遣內閣侍讀常明理藩院司務英武為使賜爾  
花緞二十疋銀茶桶茶盆各一具狐腋蟒袍一襲

貂帽一頂玲瓏鞋帶一圍皮靴蟒襪各一對爾如  
有所欲言其遣人偕使臣來奏尋理藩院以嗣後  
策旺喇卜灘使人不得過二百名具奏

上命使人往來以三百為限

辛丑

命大將軍伯費揚古遣人于喀倫外掘井費揚古奏  
言臣於二月十二日至洋河地方遇遣往看路  
之副都統阿廸等告臣云自歸化城至喀倫有

二路若自穆龍一路前進二十日可至喀倫或  
從昆都倫一路前進十九日可至喀倫此二路  
皆有溪河清泉不須掘井喀倫以外郭多里巴  
爾哈孫一路共十三站每站有井十餘處噶爾  
拜察罕庫騰一路共十七站每站亦有井十餘  
處此二路俱令其再行浚鑿有掘至五六尺者  
有掘至二三尺者深掘處尚可得水其淺掘處  
水共沙泥凍合竟不可得水臣等以阿廸等所

看二路皆可前行即率兵進發俟到喀倫外當酌量掘井以往奏至

上諭議政大臣等曰據副都統阿迪等奏其浚鑿之處仍係舊所並未另行掘視掘井之事關係軍行着喇嘛商南多爾濟同副都統阿玉璽等馳驛前赴費揚古處諭旨一到即令遣人前往掘井大兵仍照常進發商南多爾濟滿洲蒙古文義兼通凡有行文及差遣之處俱屬可用著留費揚古處一同

辦事

壬寅發

訓諭大將軍伯費揚古

上諭費揚古曰進兵之事朕已與諸臣酌議檄諭爾知之矣今聞根敦帶青貝勒已進洪郭賴之內齊斯希卜地方恐爾兩隊兵誤認喀爾喀為厄魯特此當微諭阿南達知之至於商南多爾濟當俟爾等過翁金後給之鄉導從可通之路限日差至御營

為宜此兩事雖不甚緊要意之所及交阿迪傳諭  
尋又

諭費揚古曰據總兵官康調元疏有晉撫捐助騾子  
米糧俱未解到諸語以此揆之因大兵趨期稍有  
未及亦未可定米糧牲口所關甚重爾將軍當防  
護其前後爾等路遠糧運較中路倍難萬一食有  
不繼則爾兩隊之兵不至窘乏乎朕心深憂之特  
作手書飛遞傳諭

甲辰

命詳議

親征事宜

上諭禮兵二部曰朕統御中外念切撫綏惟務休養民  
生未嘗遠事征討比年以來海宇昇平閭閻樂業  
四方固已無事獨噶爾丹荒裔狡寇肆逞克頑自  
烏闌布通敗遁之後不自悔禍仍行狂逞悖天虐  
衆違蔑誓言侵掠我臣服之喀爾喀竊踞巴顏烏

闌之地詭謀叵測逆狀已彰乘其竄伏近邊自應  
及時撲勦倘目今不行剪滅恐致異日沿邊防戍  
益累兵民聲罪迅討事不容已用是遣發各路大  
兵分道並進朕特躬蒞邊外相機行事以衆擊寡  
以正誅逆天意人謀無不允協此寇一殄則邊塵  
蕩滌疆圉輯寧內安外攘實在此舉告祭

天

地



宗廟

社稷並一切應行事宜著察例詳議具奏議曰

上躬統大軍進發應遣大臣告祭于

天

地

宗廟

社稷再起行之禮道路神太歲礮神俱應遣大臣致祭出

師之日

上親詣

堂子行禮畢由安定門大街出德勝門至土城關外八旗  
兵分兩翼陳列陳兵時以前鋒軍為始其次俱  
按旗分左翼先列鑲黃旗烏鎗護軍次護軍烏  
鎗駝騎次三旗俱照此依次排列出征

皇子王等旗纛護衛俱各于本旗護軍之中排列  
末旗烏鎗駝騎之下列滿洲礮兵次漢軍礮兵  
次漢軍火器營兵右翼亦照此排列見

駕出郭師中以啟行禮三舉轍

皇上至陳兵處官兵皆於馬上俯伏候

駕過其不隨征王以下有頂帶官員以上俱過大軍排列之前在路兩傍分列跪送并派八旗官兵肅清道路嚴禁僕從馬匹諠雜之聲

駕過後隨駐

御營人等按隊前進其次出獨石口兵丁各按隊伍隨行

皇上至駐驛處前鋒應令過

御營前駐劄隨

駕四旗官兵皆啟行畢然後令出古北口四旗兵亦照旗分各按隊伍赴扎營之處奏入得

旨出師後京師關係甚要其不隨征都統等免其送駕再護軍統領副都統叅領步軍統領步軍校等各有防守之責亦俱免其送駕餘如議行

命副都統趙珣隨征隸火器營中

丙午

命預定接戰隊伍

上諭內大臣馬思喀等曰軍士接戰當預編隊伍頭隊兵必多諸王可俱編入二隊兩脇兵亦應派定所選取勇士可編入頭隊頭隊二隊及左右兩脇之兵為最要軍士不得以前進相爭爾等其集議之議曰頭隊軍之正中排設鹿角及綠旗兵次以左右翼漢軍火礮鳥鎗之兵繼之繼此則派左

右翼滿洲火礮兵四百鳥鎗護軍每佐領一名  
護軍一名親隨護軍兩佐領合一名鳥鎗驍騎  
亦兩佐領合一名勇士及情願効力者俱派在  
頭隊其二隊每佐領護軍一名親隨護軍兩佐  
領合一名

皇子及王貝子公等俱定在二隊其左右兩脇每  
佐領護軍一名鳥鎗護軍兩佐領合一名鳥鎗  
驍騎亦兩佐領合一名行李令在二隊後各隨

本旗本叅領立于百步之末再每佐領前鋒一名烏鎗護軍兩佐領合一名內府護軍各執事人等及部院大臣官員筆帖式俱今在

御前以備調用察哈爾兵八百扎什王兵五百另作一隊預備追擊衆扎薩克之兵一至即令與察哈爾兵會合其派領兵接戰之大臣伏候

欽點奏入

上從之又

諭曰火器營軍士既派在頭隊二隊其火器營大臣  
即率之接戰至于都統護軍統領副都統等俱係  
特簡大臣人材偉岸並無庸懦者頭隊二隊及兩  
脇可各照各翼掣籤以定昔

太宗皇帝時公彭春之祖和碩圖於南苑交戰橫衝而出  
奮勇破賊故封以公爵今有能越衆効力者朕自  
不靳爵賞若退縮不前者治罪無赦都統兼前鋒  
統領碩鵠著統前鋒而行提督張雲翼著與都統



鄂倫代一處効力副都統吳達禪齊藍布令隨駕  
行穆森等隨從皇子不必編入隊伍領侍衛內大  
臣目下無庸派出俟臨期再行撥派于是從征大  
臣公同掣籤都統蘇努杜思噶爾石文煥護軍  
統領鄂克濟哈蘇丹副都統崇古禮胡什巴阿  
爾納莫洛渾龍什庫掣得頭隊都統齊世噶爾  
馬副都統錫柱噶爾必阿喀納鄔赫掣得二隊  
都統阿錫坦副都統達禮善納泰掣得左脇都

統周卜世副都統法喀渣喇克圖掣得右脇奏  
上得

旨渣喇克圖著派在頭隊龍什庫調撥右脇隊內定  
中路軍營

上諭內大臣馬思喀等曰中路護軍及驍騎可列為十  
六營爾其酌量集議議曰

皇上駐蹕處為一營八旗前鋒軍列作二營八旗護軍  
及驍騎列作十六營八旗漢軍火器營兵隨礮

兵礮手綿甲兵列作四營部院大臣官員筆帖式等列作一營左翼察哈爾兵列作二營宣化府及古北口綠旗兵各為一營至守護

御營官兵亦應派定查內府護軍及執事人員總計四百二人網城內安設巡警二十一處每處派章京一員內府護軍及執事人十名守之網城三門每門派護軍及執事人十名守之外營安設巡警八處每處派章京一員侍衛鑾儀衛官執

事人共十名守之外營四門共派護軍執事人四十名守之馬匹牧場于上三旗每旗派章京一員侍衛及鑾儀衛官執事人三十名守之禁止喧譁者于上三旗每旗派章京一員護軍併執事人役共二十名督之通計一班需用五百四十人此分編營壘以及守視

御營諸事俱交領侍衛內大臣護軍統領及總管內務府大臣約束督理奏入

上曰鑲黃旗大營內著皇七子胤祐都統杜思噶爾副  
都統達禮善內大臣額駙尚志隆督捕理事官溫  
達鑲黃旗小營內著貝子蘇爾發副都統喀爾沁  
副都統錫柱正黃旗大營內著皇五子胤祺都統  
侯巴渾泰副都統阿喀納學士宋柱內大臣布克  
韜正黃旗小營內著宗室公蒲圻都統周卜世副  
都統莫洛渾正白旗大營內著信郡王鄂扎都統  
阿錫坦副都統阿爾納學士席爾登正白旗小營

內著宗室公吞珠都統石文煥副都統胡什巴正  
紅旗大營內著皇四子公常泰都統齊世副都統  
法喀原任尚書顧八代侍讀學士覺羅華顯正紅  
旗小營內著宗室公齊克塔哈護軍統領鄂克濟  
哈副都統渣喇克圖鑲白旗大營內著恪慎郡王  
岳希都統噶爾馬署護軍統領桑格副都統納秦  
鑲白旗小營內著貝子吳爾占護軍統領蘇赫鑲  
紅旗大營內著皇三子胤祉公福善副都統孫渣

齊侍郎度爾達學士三寶鑲紅旗小營內著宗室  
公蘇努副都統鄔赫正藍旗大營內著顯親王丹  
臻副都統柴穆布學士常綬正藍旗小營內著閒  
散宗室哈爾薩副都統崇古禮鑲藍旗大營內著  
康親王傑淑原任內大臣阿密達副都統宗室鄂  
飛鑲藍旗小營內著貝子魯賓原任都統喀代副  
都統龍什庫率領再八旗漢軍火器營鑲黃正白  
兩旗合為一營著都統公鄂倫代副都統公孫徵

灝正黃正紅兩旗合為一營著副都統張所知都  
統王永譽鑲白正藍兩旗合為一營著副都統雷  
繼尊都統李正宗副都統喻維邦鑲紅鑲藍兩旗  
合為一營著副都統費揚固趙珣都統諾穆圖副  
都統宗室巴賽副都統張朝午率領其察哈爾兵  
著貝勒多爾濟渣卜閒散大臣吳巴什統領餘如  
議行尋以侍郎席爾達為部院營夸蘭大

嚴禁蒙古盜竊



上諭理藩院曰官兵馬駝及坐臺馬匹關係緊要應檄知衆扎薩克及喀爾喀扎薩克等嚴禁各旗偷盜如有干法者即按軍法梟首示衆家產籍沒入官其該扎薩克以及該管人員從重治罪爾部院即遣撥什庫馳驛前往遍行曉諭

申命整修運道先是

上命內閣學士齊穡監修塞外路徑至是復

諭總理運務于成龍等曰朕為運米一事于口外應

修之路已派大臣監理爾等勅書內亦有貽悞修路搭橋者即行指名題叅語今運車以次經行苟一有傾圯即著修路大臣立行整治毋貽後至之憂速趣知之

丁未

申諭行軍法禁

上諭議政大臣等曰軍士所賚米糧務如數攜帶自啟行以至在途該管官員不時嚴查倘有減數帶往

者將本身及該管官員一併從重治罪有盜米糧  
馬匹逃回者擒之殺無赦軍士有縱酒殺人或鬪  
毆傷人者不俟秋後立行正法扎薩克蒙古等有  
盜我軍馬匹者即行梟示軍士及廝役等有盜貿  
易蒙古之馬匹者亦即誅戮昔時行軍以廝役牧  
放馬匹此番既派出軍士守視其庸劣不堪之廝  
役可停其帶往至于隨軍貿易之人固不可禁若縱  
其貿易又至紊亂應于某營相近即令某營之夸

蘭大派出章京于一里外指地駐劄准其貿易嚴  
禁喧譁火燭并戒沽酒倘貿易人不遵法禁偷盜  
馬匹米糧者亦殺無赦帶往之人一併治罪軍士  
或盜米售與貿易之人或強買搶奪者定加以重  
罪可通行曉諭使咸知凜遵尋理藩院以大兵經  
行蒙古地方准令蒙古等沿途販賣駝馬牛羊  
等物奏請得

旨爾院可另設一營其販賣人等即在爾營內貿易

大軍十六營中每營派官一員專司貿易之事如有指稱貿易行竊者不分首從梟首示衆妻子家產籍沒入官爾院即行傳諭

戊申內齊陀音庫圖克圖等賫達賴喇嘛等奏  
章還復

命先是差喇嘛內齊陀音庫圖克圖御史鍾申保往  
召班禪庫圖克圖至是內齊陀音庫圖克圖等  
還賫達賴喇嘛奏章至其詞曰謹奏

聖主睿覽我自壬辰年入京得覲

聖明中國與西域道法歸一以來嘗以應行事宜上奏  
聖明近緣召見喇什龍布班禪備遣使幣謹以

皇上寵眷之意宣告班禪而不能趨赴伏祈

鑒宥尤冀字內

元后至仁至明立化昏悖之徒永開非常無量善門班  
禪庫圖克圖疏曰奉到

勅書

賜物不勝懽忭臣自有生以來與徒衆焚誦

上祝

聖明未嘗少懈又蒙

皇上寵眷降

旨召赴

金闕以覲

天顏理應趨赴仰荅無量

隆恩但我土伯特國俗大忌痘疹是以甚畏之且奈

冲占得大凶不利有攸往之兆不能上副

皇上之意謹銘刻于中在西方與僧衆誦經不絕伏乞  
仍前鑒恤頻加

教誨第巴疏曰博碩克圖汗在本地聞

皇上召班禪遣其喇木扎木巴納木喀林辰沮班禪庫  
圖克圖勿行職以此故班禪庫圖克圖不行之  
意遂定想或因未出痘疹懼而不往耳臣遣使  
往諭班禪庫圖克圖彼竟不允伏乞



鑒宥達賴汗疏曰為召喇什龍布班禪事臣致書兩  
次以為當行而彼竟不從伏乞

睿鑒據此奏

聞得

旨下所司內齊陀音庫圖克圖賚達賴喇嘛等疏至  
留其使于西寧應否放入著議政大臣集議隨議  
達賴喇嘛等遣使陳奏班禪庫圖克圖不來情  
由及噶爾丹之昏悖其使理應放入請差理藩

院官一員往取達賴喇嘛使人戈尼爾羅卜臧  
帕克巴格隆及諦巴使人羅卜臧蓋遵等來京  
其貢物令交所司奏入

上從之

庚戌

命大軍兩路出口并分翼牧馬

上諭兵部曰此番出征兵馬衆多可分為兩路出口前  
隊者牧馬于路左仍留路右以待後隊之牧放則

牧場不傷于軍士大有裨益可將鑲黃正黃正白  
正紅此四旗前鋒軍并綠旗營前鋒軍為一隊繼  
以宣化府綠旗兵左翼察哈爾兵為一隊繼以御  
營又分四旗兵為四隊漢軍火器營兵為一隊出  
獨石口再將鑲白鑲紅正藍鑲藍此四旗前鋒軍  
并綠旗前鋒軍為一隊繼以古北口綠旗兵為一  
隊再繼以四旗兵分為四隊漢軍火器營兵為一  
隊令其出古北口軍行一日一隊接踵進發出獨

石口之前鋒軍鑲黃旗正黃旗兵綠旗兵馬匹俱  
牧于路左正白旗正紅旗兵及漢軍火器營兵馬  
匹俱牧于路右其出古北口之前鋒軍鑲白旗鑲  
紅旗兵綠旗兵馬匹俱牧于路左正藍旗鑲藍旗  
兵及漢軍火器營兵馬匹俱牧于路右可通行傳

諭

將軍孫思克等奏報進剿事宜及率兵起行日  
期孫思克等奏臣等率總兵官董大成潘育龍

等之兵急行而來俱于二月二十二日前已到  
寧夏簡閱肥馬選得臣孫思克標兵一千八百  
董大成兵一千二百潘育龍兵一千併計殷化  
行兵三千湊足七千合滿洲兵三千共為一萬  
至榆林總兵官柯彩雖身帶本標兵前來因向  
未派出故諸物不備且各處總兵官俱經調發  
邊疆地方不便盡令空曠是以令柯彩及其兵  
一併遣回本汛至進勦綠旗兵除本身之馬一

匹外增給馬一匹及滿洲綠旗官兵僕從馱糧  
馬一匹俱于留住兵丁及採買馬匹與捐助駝  
馬內視騰大者撥給前議以牛羊為一月糗糧  
攜帶四月米今方春令牛羊甚瘦雖驅之而往  
亦無實濟故羊一隻折給銀五錢令各自備一  
月糗糧其前進之兵親攜四月之米則滿兵僕  
從少綠旗兵並無僕從難以攜行是以臣等公  
議減去三千僕從之米令前進之兵攜帶三月

米一月糗糧留回時所食一月之米隨後追送  
翁金臣等酌留官兵于翁金收此解往一月之  
米此米關係甚大不得不選文武材能大員多  
帶兵丁護送故簡鞏昌按察使囊吉里漢中副  
將楊琳洮岷道董紹孔又酌撥同知知州知縣  
叅將遊擊守備千總把總等官發步兵二千令  
牽趕米馱發馬兵五百護送酌撥副都統阿南  
達帶來理藩院筆帖式撥什庫率鄉導引路使

至翁金臣等料理出兵諸務俱已完畢將軍孫  
思克博濟等兵于二月二十二日自寧夏起行  
總兵官董大成殷化行潘育龍等俱陸續進發  
矣為此奏

聞

辛亥

命以車馬撥給護運兵

上諭總理運務于成龍等曰總兵官岳昇龍劉國興所



率騎兵五百名護運米車亦殊勞苦伊等除本身所乘馬外並無餘騎爾等可於預備車馬內酌量撥給以為彼乘坐裝載之用

壬子

諭總理運務大臣等先事奏請

指授先是

上以備運米數過多恐車重難行

命于成龍等于正額米外祇備帶八千石前往至是

上復諭于成龍等曰餘米一減車行必至輕快嗣後爾等凡事遇疑難即行入告朕當立加指示倘不先事奏請以致臨期有悞朕何難治爾之罪但受譴事後於爾當矣朕何補焉爾等自今其臨事毋忽

癸丑

命部院大臣分入

皇子諸王營中佐理軍務

上諭從征部院諸大臣曰皇子等雖習練馬步騎射然

未經大事即諸王中之經事者亦少爾部院諸臣  
効力年深曉暢事務朕特加選擇更調旗分派入  
皇子及諸王營內凡一切法度及號令軍士諸務  
令與皇子諸王公同議行戰陣事亦共相籌畫皇  
子諸王設有過愆即正容勸導如不聽納即以奏  
朕倘負朕委任之意致營壘不整軍紀不肅或皇  
子諸王過愆不行勸導不即奏聞者朕定以軍法

治罪不恕

命給輓車蒙古兵行糧軍器時派出輓運中路米車之喀喇沁兵一千翁牛特兵五百至京

上諭總理運務于成龍等曰喀喇沁及翁牛特兵內凡無弓矢者按名給弓一張戰箭二十枝并撒袋俱取之兵部如不足則于內庫領給無鳥鎗者可給與鳥鎗鉛子火藥取之工部伊等驅車勞苦著三省巡撫每兵各給以衣一襲鞋一雙并照滿洲綠旗兵例給與行糧

甲寅

申諭師行紀律

上諭議政大臣等曰前者征討噶爾丹因師行無紀以致彼此不能相續今親統六師前進法律須加嚴明師行之日軍士俱先于郊次排列俟朕啟行後仍復入城按日逐旗而出務必隊伍嚴整夸蘭大叅領等各率本營行裝按隊前進不得畏避塵土分散錯亂倘馬驚人墮致失馬匹者令該夸蘭大

章京及護軍校等親往尋獲中路軍雖行尚俟西路消息倘值大雨即令駐劄其後隊營伍不必等候傳示亦行屯駐再每營俱撥給醫藥凡軍士及僕從有患病者該夸蘭大即發醫調治倘病勢危篤即報知該營皇子王等留住臺上將伊分內之米一併留給病痊仍令前進或有病故者即留臺上俟旋師日帶回凡一應細事該營之皇子及諸王大臣夸蘭大等公同結案事關重大再行請旨

凡遇敵兵令我軍攻擊朕必詳審可攻之處始令前進必不以軍士軀命為嘗試如臨陣遇敵不能奮勇敗賊雖皇子諸王亦在不赦必治以罪前行之前鋒倘望見敵兵必視有水草處駐劄以俟後隊軍至可通行曉諭八旗至于大將軍伯費揚古處亦應檄知令其遍示

諭後派護軍留京師以備調遣

上諭大學士阿蘭泰等曰中路軍士甚衆後派之每佐

領護軍一名無庸帶往取其肥健馬匹給發前去  
軍士則馬匹充裕矣此存留每佐領護軍一名仍  
令照常預備俟有需用之處一行徵調即速起行  
再後隊之章京護軍校等亦俱停其前去著在京  
預備

丙辰

上統大兵發京師討噶爾丹先是科爾沁土謝圖王沙  
津於木蘭行獵之地來請



安

上召沙津入行宮密諭曰爾可遣人說噶爾丹來至近

地沙津遵

諭潛遣俄齊爾約之噶爾丹果沿克魯倫而下掠喀

爾喀納木扎爾陀音遂踞巴顏烏闌

上聞之思機會不可失當亟行事遂經畫糧餉調度各路兵馬不俟草茁

親統六師即於是日啟行瀕行分遣內大臣國舅佟國

維等告祭于

天

地

宗廟

社稷

太歲壇其文曰維康熙三十五年歲次丙子二月丁亥

朔越二十七日癸丑臣敢昭告於

皇天上帝曰臣仰承

鴻祐臨御兆民夙夜恪恭罔敢逸豫惟期中外乂安咸遂  
生養比年以來厄魯特噶爾丹荒陬狡寇悖逆  
天常肆行凶虐曾經征勦窮寇敗遁廼猶怙終不悛蔑棄  
誓言侵掠喀爾喀潛伏近塞詭詐跳梁稔惡已  
極久為人心所共憤自為

上蒼所不容臣茲恭行

天罰聲罪致討遣發大兵分道並進臣特躬蒞邊外相機  
行事用掃除頑梗之患以永綏荒徼之民擇于

二月三十日啟行伏祈

帝鑒謹

告其祭

地壇諸處祝文畧同至是日寅時

上恭詣

皇太后宮問

安畢出

午門排儀仗率諸王文武大臣詣

堂子行禮將至鳴角入

堂子禮畢出內門致禮于

旗纛既畢出德勝門至排軍處三舉礮八旗前鋒

護軍火器營兵分兩翼以次排列

駕過官兵各整隊伍相隨進發

諭內大臣公福善嚴督所領軍士

上諭福善曰出古北口一路兵衆惟爾督率而行凡所  
過城池村舍恐軍卒或入搶擄當行嚴禁兵丁馬

匹最要須加意牧養朕前所示法令極明毋使有違爾身係內大臣雖諸王亦聽爾言出古北口後或有無知之徒以捕獸馳騁勞苦馬匹者當嚴行禁止務須按路進發

上又諭內大臣國舅佟國維等曰軍行以馬為重防汛務須嚴密倘不嚴慎馬匹被盜必驅回京師仍賣與我軍應交該管大臣將牧場加意謹防毋致疎忽

命總理運務于成龍等修理道路

上諭內大臣國舅佟國維等曰朕觀所修道路甚屬不堪可著總理運務左都御史于成龍等俟米車過後即行修理再軍士車輛不以次前進俱並軌而行倘遇隘口阻滯則後軍必致遲悞嗣後大軍車輛俱著依次前進毋得爭先壅塞

恩賜喀爾喀台吉波羅吳納漢銀兩駝馬時台吉波羅吳納漢以願從軍奏請

上諭署理藩院事尚書馬齊曰波羅吳納漢遠來歸順  
且欲從征殊屬可嘉著賜白金百兩其所乘馬駝  
及需用什物爾等可查明辦給令于翌日起程隨  
行

遣內大臣馬思喀致祭火礮之神文曰惟

神德秉祝融功侔上將聲騰塞外山岳動搖勢振  
師中雷霆飛掣爰藉摧堅之力丕彰勦逆之勲  
朕親蒞邊方掃除狡寇用資神武遠播英風特



遣專官聿申祖祭尚饗

遣副都御史席密圖致祭道路之神文曰惟

神翊衛周廬肅清蹕路師中助順塞外宣威朕茲  
親蒞邊方掃除狡寇惟

神默佑利導前驅特遣專官虔申禋祀尚饗

聖祖仁皇帝親征平定朔漠方畧卷二十

欽定四庫全書

聖祖仁皇帝親征平定朔漢方略卷二十一

三月丁巳朔

駕至南口

諭軍中潔水泉避毒草

上諭內大臣等曰凡安營之處次日水皆穢惡後至之  
兵復駐營于此其水尚堪飲耶爾等宜嚴諭切禁  
勿致水有污穢又

諭曰至道之東山有毒草恐不知者牧放馬匹致有損斃可遍行曉諭

命內大臣明珠與議政之列

大將軍伯費揚古奏報喀倫外掘井得泉先是上遣副都統阿的等往喀倫地方視水草回奏冰雪未化仍前凝凍未能掘井

上以用兵之道以速為貴大兵行期斷不可緩大將軍費揚古兵已定于二月十八日起程京城兵以二

月三十日起程正當春季地脉將融之時雖冰凍  
可以疏鑿隨遣副都統阿玉璽等馳驛往喀倫外  
掘井至是大將軍費揚古奏至言阿玉璽等于二  
月二十四日至巴爾幾烏闌和朔哨口自己至午  
掘井數處去冰尺許清泉湧出浚鑿甚易奏至

諭大學士伊桑阿等曰今日大將軍費揚古所奏驗  
試掘井事著送學士三寶處令三寶轉奏皇太子  
其來奏事之副都統阿玉璽朕已問明言凍止尺

許掘之甚易其水即湓湓而出將此亦奏聞皇太子頃朕所經行之路修治未善石塊亦未盡除三寶仍馳驛往古北口視所修道路其糧車已行一二日或有礙行走與否所修之路善與不善俱著察明并詢問運糧官員速來具奏

戊午

諭出口輜重毋得停留

上諭議政諸臣曰聞車輛及馱載駝馬皆阻獨石口凡

先行之車輛馬匹俱屬軍需毋得停留若一停留  
必愈致壅塞可速遣人往令隨到隨行

命防降人喀爾喀洩漏軍情是日

駕至榆林侍郎安布祿解降人喀爾喀庫布爾至疏稱

二月初四日遣喀爾喀車里木等十七人往探

噶爾丹情形踪跡于本月二十四日車里木等

還言我等于本月十二日至扎爾柴呼戶德勒

蘇台地方見有百餘駝馬之跡隨躡其踪追至

車本洪俄爾地方見百餘人俱係喀爾喀及詢問之有一喀爾喀言我係公西布退哈灘巴圖爾之姪輩名庫布爾特歸附

聖主而來故我等帶至乞為轉奏謹將庫布爾台吉及同來之貝代一併遣往謹題奏

聞

上諭理藩院曰貝代著留住此地此無他故誠恐其馳驛而還將出師事妄行招搖漏洩音耗噶爾丹聞



知或至遁走亦未可定故留住于此俟出邊後酌  
遣前往再語筆帖式納延泰凡有問大軍行間之  
事者但云不知慎毋洩漏并語筆帖式納延泰同  
來之人此事若有洩漏即汝之由務宜緘口斷不  
可語人再語侍衛鄂齊爾都喇爾彼處喀爾喀等  
若問軍中信息亦但以不知答之勿致洩漏再向  
庫布爾台吉言爾之事至京時已經奏聞因爾屢  
次奪取厄魯特馬匹殺戮其人奉旨極其褒獎其

貝代因有別用故暫留住

遣左副都御史阿山于居庸關祭山川之神文曰惟  
神擁衛神京控引朔塞地靈攸萃天險夙稱朕茲親

蒞邊方掃除狡寇惟

神默佑迅奏膚功爰遣專官虔申禋祀尚饗

庚申

駕發懷來駐蹕石河

命侍郎馬爾漢駐劄土木飛報軍情

上諭議政大臣等曰大將軍費揚古題報事情先經會議到京即行馳奏今土木地方距京二百餘里俟到京之時再奏不免紆遲重複應遣兵部大臣一員住于土木地方一則料理驛站一則費揚古題奏本章到時一面開拆謄寫啟奏皇太子一面將原本馳奏如此則事務不致重複著議政大臣及部院大臣等會議具奏大臣等會議

上諭極其周詳應即遵行所派大臣恭候

欽點得

旨著侍郎馬爾漢去凡事一面啟奏一面送京務加  
謹密馬爾漢未到之先著侍郎朱都納暫住土木  
料理俟馬爾漢到交代畢即速來馬爾漢既來則  
兵部止存尚書索諾和一人著學士綏色署理朱  
都納既暫留土木嗣後凡關兵部事宜著交大學  
士伊桑阿管理又傳

諭曰前曾以調養馬匹及飲馬之法通行曉諭今見

沿途馬匹汗尚未乾輒行飲水往返應差馳走者甚多朕尚愛惜馬匹不輕驅使此後須有不得已事方可乘用其飲馬務遵前諭俟汗乾時始令飲水著再嚴加傳飭是日學士覺羅三寶至入奏相視道途事

上問爾至何處即來脩治道途如何三寶奏曰出古北口行二十餘里即來所見道途脩治極其平坦上問遇于成龍否三寶奏曰于成龍尚未起身遇運米

郎中噶禮等據言道途脩治甚善車輛不致耽延仰賴

皇上洪福諸處皆可行走又西路之兵于喀倫外掘井清泉湧出得水甚易奏聞

皇太子

皇太子甚喜言此真屬

天助前者西路之兵惟以水為慮今無復憂矣臣奏畢出

遇大學士阿蘭泰尚書馬齊等問知其故俱踴

躍歡忭言從來蒙古地方至四五月時尚凍今  
二月內於喀倫外掘井水泉湧出不勞而得

上天眷命國家佑助

聖明凡事悉如

皇上所料賊寇噶爾丹指日撲滅無可慮矣

辛酉

喀爾喀貝子盆楚克告請從軍

許之是日

上駐蹕真武廟地方喀爾喀貝子盆楚克同伊子台吉

沙穆必爾至奏言

皇上親統大兵臣父子願于軍前効犬馬微勞

上曰善爾父子可俱從行隨

賜以蟒衣綿甲袍服帳房駱駝羊馬等物又

命其在京之子台吉根敦渣卜仍回本部落盆楚克

叩頭奏曰臣等遐荒蒙古受

皇恩甚深今又荷此



殊恩臣父子惟于行間致命効力而已

乙丑

申定出口軍行事宜是日

上駐蹕毛兒峪

諭議政大臣等曰先令夸色往歐德哈爾哈等處偵探消息一切事宜已有諭旨其間情事著夸色言之至出口後凡牧馬駐劄行走之處應行預議將此一併會議具奏議政大臣等會議奏曰查先經

會議

皇上駐蹕立一營八旗前鋒等二營護軍驍騎十六營  
漢軍火器營兵隨礮兵丁炮手綿甲兵四營部  
院大臣官員筆帖式等一營左翼察哈爾兵二  
營宣化鎮綠旗兵一營又前曾奉

旨至多雲地方照舊排列環營又曾會議

御營兵前鋒鑲黃旗正黃旗綠旗兵之馬于路左放牧  
正白旗正紅旗火器營兵之馬于路右放牧今

議放馬列營之處仍照前議奉

旨照前議行甚當

諭隨軍車輛結隊前行

上諭議政大臣等曰觀車輛輓行有越前者有在後者若出口後如此散行則在後車輛恐被掠奪應令車輛自出口後俱結隊前進若牲畜疲乏者留置著驛站官員看視

命以掘井事宜交前鋒統領碩鼐先是以掘井事務

交署前鋒統領奎色至是遣奎色至歐德等處  
地方偵探

上諭議政大臣等曰今遣奎色往歐德地方約計兵丁  
所需應掘井幾處可交與前鋒統領碩鼐料理  
命調京師馬匹至軍前備用

上諭議政大臣等曰內廐馬撥一千匹兵部馬撥五百  
匹八旗佐領所養馬內擇其肥者撥一千五百匹  
共三千騎于每佐領所留護軍一名內酌量派出

令同內廐人將此馬趕護于三月二十日啓行出  
張家口約行二十餘日可到此馬到時如正當對  
敵之際則給兵騎用甚有裨益即旋師時散給俾  
彼疲瘦之馬得以空行不致捐棄則于兵丁馬匹  
亦大有濟其趕護馬匹之護軍與內廐人亦應照  
出征人例給馬四匹著會議具奏議曰

上諭所及已極周詳三千馬匹于三月二十日起程出  
張家口行二十餘日今至克魯倫河歐德地方

會齊其鄉導之人應交理藩院派出二人于張  
家口守候令領路前進奏入奉

旨朕已派副都統管上駟院事宗室阿喀納二等待  
衛鄂克濟哈阿齊圖架鷹人已爾拔令賁回皇太  
子所送馬匹可即以此馬令其帶來

命侍衛馬武選擇宣鎮兵先是

上諭兵部宣化府兵三千過多可減去二千止留一千  
則馬有餘至是

諭議政大臣等及大學士伊桑阿曰聞前任宣化總兵官許盛推托有病並未操練兵丁所以宣化鎮兵甚不適用著遣侍衛馬武侍郎阿爾拜前去揀擇兵丁不堪用者撥回惟二十四位礮需用護送兵丁著選足帶往前行隨

諭馬武阿爾拜曰爾等此去亦傳諭總兵官白斌云聞前任總兵官許盛推托有病兵丁未經操練所以宣化鎮兵舉無足觀亦甚不堪用兵丁全在精

銳若兵丁不堪則多帶反悞朕之行師矣

諭尚書班第隨大軍設驛理藩院等衙門奏言三月

初五日奉

旨諭尚書班第云跟隨大兵安站甚屬緊要爾可留  
後安站而來著再傳諭驛站官兵凡有患病物故  
留於驛站者令官兵善視之大軍回寨加賞賚其  
某站現有某官著開明具奏兵丁馬匹駱駝有羸  
瘠者令管站諸人收養俟旋師時各歸本主庶不



致遺棄著同大學士伊桑阿會議具奏議曰隨師

安站先曾詳奉

諭旨已經定議今又以驛站甚屬緊要令尚書班第  
留後安站及傳

諭驛站官兵於諸事甚有裨益俱應欽遵

上諭施行

從之

命早行晚炊

上諭議政大臣等出口以後侵晨啓行日中駐劄衆皆  
每日一餐

丙寅

駕至獨石城

命斬木以備兵器

上諭領侍衛內大臣等曰兵办之佳者人未必盡得口  
外遇有樹木著隨從人等取以為槌無過五尺亦  
兵器也

丁卯

上出獨石口駐蹕齊倫巴爾哈孫

諭特角安營便宜取水

上諭議政大臣等曰有河之處猶可相接駐營至掘井  
地方若不按營伍接連駐扎則鑲黃旗兩營之人  
取水飲馬皆穿大營而行或致爭水鬪毆亦未可  
知往前二三日程俱有河仍令照常緣河就水從  
便駐扎至掘井之處以井居中大營并鑲黃旗兩

營互相犄角如此則取水飲馬甚易不致爭鬪其  
井著派官兵看守無使汙壞後隊兵著接遞交  
付

申今晚炊早發

上諭內大臣等曰今日營中見仍有晨炊者在口內勿  
論自今日以後五鼓起程時不得舉火晚刻舉火  
炊飯在所不禁可將此嚴加傳示又

諭曰今地方寬廣不致擁擠三旗輜重令各按旗分

列隊並行既不早餐則晨興時可各撤帳房速行  
裝載將此通行曉示是日

頒賞各營軍士羊隻衆軍士跪奏曰我等未出兵時  
屢膺

聖上重賞今出兵未久並無汗馬微勞又蒙

恩賜倘遇噶爾丹時惟有效力圖報使盡殲滅而已  
奉

旨已悉爾等歡欣奮勇前途遇賊惟視爾等之効力

矣復

賜貝勒額爾德木圖巴克席胡爾親隨台吉畢立克  
圖吳勒木濟吳爾圖納蘇圖畢羅札納札木素  
達木楚克閒散台吉布達喇席希卜及挽車喀  
喇沁蒙古羊隻自是以后隨征出哨運米人員  
皆酌

賜牛羊

遣戶部侍郎阿爾拜致祭獨石口山川之神文曰惟

神峙臨邊塞襟帶朔方峰壑高深靈爽著朕茲親  
蒞邊外掃除寇氛特遣專官用申禋祀惟

神默佑迅奏膚功尚饗

戊辰

上駐蹕諾海和朔嚴飭晨炊晚發

上諭領侍衛內大臣等曰今日朕自五鼓起行見炊煙  
甚多朕每日一餐凌晨即撤營就道已有明旨乃  
於朕起行之後軍士尚在營中眠食行李淹遲著

領侍衛內大臣內務府總管武備院總管將鄉導  
及駱駝頭目等稽遲行李之故察明回奏領侍衛  
內大臣佟國維蘇爾達索額圖馬思喀同跪請罪  
曰今日軍士舉火炊飯併行李稽遲皆由臣等  
庸劣不能管攝之故也敢請

皇上將臣等四人嚴加處分則衆皆知懲矣奉

旨爾等所奏亦是與軍士無涉記罪俟至京城議處  
此際爾等宜効力贖罪又



諭曰兵丁有遲至三鼓時始到者此時燈火自在所  
不禁若三鼓後舉火張燈則斷不可矣著通行曉  
諭

已已

上自出京常以休息士馬為念行十餘日皆以漏盡輒  
起程而行李尚不能早至軍士人等不得及早  
安營

上因是五鼓即興

親視馱載前發方啓行比駐營時日甫已刻行李已畢  
至矣於是士馬大得蘇息是日

駕至青城傳

諭領侍衛內大臣等曰今日行李行走甚善無可議  
矣但侍衛官員人等前令各領行李而行今並未  
見有隨行者嗣後著各領行李至駐紮處各相助  
安營朕每日常於野次如此斲坐若於朕前過者  
俱勿下馬又

諭侍郎朱都納曰此後驛站馬匹勿令恣行馳騁如有應疾馳事務即以奏聞是日申刻

上出行宮令喀爾喀貝子盆楚克等射射畢

上親率

諸皇子并侍衛等射

上連發五矢俱中兩翼侍立蒙古諸王台吉及貝子盆楚克等皆驚異讚美曰射之

神奇有如此耶矢不虛發非惟臣等目所未睹亦耳

所未聞

皇上英武誠邁世矣於是衆皆跪請視

皇上之弓

上笑以所持弓授親近侍衛吳什傳示衆皆遞相控引  
竟不能張乃復相顧驚嘆曰如此勁弓如何引

滿耶既畢

上入行宮薄暮又傳

諭曰天氣陰晦恐即有雨各將馬匹加意苦護著通

行曉諭

庚午

上仍駐蹕青城

諭曰今日因天陰暫行駐扎馬匹加意苦護著於上  
駟院侍衛馬什所指引地方牧放又奏事敦佳傳  
旨今既駐蹕令衆皆炊食又傳

諭領侍衛內大臣等曰今日當至滾諾爾地方駐蹕  
以天氣陰晦暫駐于此過滾諾爾至揆宿以前俱

有可燃之薪目今樵薪缺乏各宜節省著通行曉諭領侍衛內大臣等遵

旨察閱官兵車輛共一千一百有餘具奏奉

旨爾等所攜車輛如許朕深以為喜是皆朕之軍資也除大臣官員富室人等外察其見在遲悞不能行者各給一牛俾令輓到

大將軍伯費揚古等奏報率兵先進費揚古奏言副都統阿玉璽等於三月初八日已到臣處

看得西路大兵甚衆如作一處行走則水草雖有而牲口衆多春草必至踏壞為此臣率領自京城發來大兵前行將右衛大兵留一日程使接續行走于十三日可至喀倫至喀倫時詢明喀爾喀之明白鄉導約計到翁金土喇日期另行具

題外查得兵部移文內開侍衛海青傳

旨新經造出四十八位礮內著將八位每旗派礮手

一名馳驛速送大將軍費揚古軍前等因于二十日文到即將右衛副都統馮國相八旗章京八員兵八十名留于歸化城西四十里于山西捐助八百餘匹馬內撥給馬一百四十匹俟礮到日令收取速趕大軍前來一面行文驛站筆帖式等送往軍前礮位若到某驛到日即行申報又曾屢次遣中書筆帖式等催促前去據殺虎口驛站筆帖式碩色雖報稱自京送來礮八



位于三月初三日已到殺虎口及問副都統阿  
玉璽云我初六日到歸化城礮猶未到看此礮  
位勢必遲悞因接續安驛令將礮位作速送到  
已遣筆帖式前去若大軍至喀倫礮猶不至臣  
等恐因守候礮位以致師行遲延今酌量添留  
官兵著將礮位作速趕赴大軍謹具奏

聞奉

旨著示議政大臣等令收貯

辛未

駕向滾諾爾前發雨雪交作

上既至駐營處御雨具埽立曠野侍臣以

行宮既張天寒雪大請

上入行宮

上曰軍士未盡安營朕何忍就帳房以自逸俟衆軍士

結營畢始入

行宮俟營中皆炊飯然後進

御膳至晚

遣親近侍衛海青以駱駝載綢城內所設帳房及食物柴炭賜輓車未至之人令棲息舉火是夜寒甚衣盡沾濕未得食者甚多忽見

皇上欽遣人至衆皆歡呼曰我等得更生矣於是無一人為寒所苦者隨

諭曰雨雪如此天氣甚寒馬雖遮護亦寒慄不能食其瘦者猶可無恙肥者却易致凍斃宜將寒慄之

馬向順風馳二三里許令人圍繞之馬既稍溫自然便溺食草如此則無妨矣著通行曉諭

壬申

命黑龍江將軍薩布素率兵趨克魯倫先是

上遣前鋒叅領納林往令將軍薩布素統黑龍江及盛

京寧古塔三路大兵前進至是納林還代薩布素

奏言臣今老病衰殘嘗患不能仰副

皇上諭旨不勝惶恐業已具疏陳奏

皇上若允臣請臣當率所屬兵丁竭力報効若仍命總管三處兵丁則衆兵會合雖在一路但係各處調集之兵人心不一亦未可料使俱在一處行走一處結營則不能整齊即至交戰之時欲參雜排列一同臨陣似亦甚難詢問喀爾喀之知地形者云行兵之路地多曠野雖間遇有山嶺皆可相並而行故臣意衆兵會合之後日間各取路並行各設斥堠昏夜駐扎亦各結營壘戰

陣則各行排列分派隊伍遇有指揮則所指之處無可借端推諉而各所訓練官兵心皆固結其壯勇爭先實意効力之人自不致遺漏而官兵皆無不鼓舞矣臣等之兵若于三月內起行俱遵

皇上指示若三月內不出則于四月初草生之時豫先啓行於雅爾濟泰周圍形勝之地屯扎其寧古塔兵令往磨爾昏地方周圍相近處屯扎

盛京兵令擇相宜處前進屯扎如此則或中路調用或遣赴別路俱不致遲悞于軍務甚為有益奏上得

旨盛京及寧古塔兵依將軍薩布素所奏前進屯扎薩布素著率所屬兵一千五百賞三月糧於四月初旬啓行前來克魯倫地方有生巴爾虎之人若來時相遇則收集同來又聞喀爾喀阿里雅扎薩克車陵渣卜等七台吉在俄濃地方此信不甚明

晰應令行在兵部以印文遣理藩院才能撥什庫  
自邊外竭力星馳遞至薩布素處俟回日重加賞  
賜一面移會京師亦行文知會彼處是日

上仍駐蹕滾諾爾以軍士車輛有未至者

諭皇長子及領侍衛內大臣馬思喀曰稽留嶺上車  
輛并陷泥淖內者其車主令各帶行李俱留皇長  
子營內仍以牛賞之又

諭領侍衛內大臣等曰凡有車輛之人欲往迎者即



刻遣人迎之今內大臣等已率衆往矣著通行曉諭

癸酉

駕次揆宿布喇克

申定軍行次序

上諭領侍衛內大臣曰出古北口之前鋒兵現今已到應令合于前鋒兵營一同先行其次著兩路綠旗兵察哈爾兵隨行其次著鑲黃旗正黃旗兵在朕

軍前行朕軍後著正白旗正紅旗隨行其餘各旗俱兩旗合軍照此隨行

命早炊步行

上諭議政大臣等曰沙崗難行馬匹勞苦是實自滾諾爾地方至撥宿布喇克原文量六十七里今遣人丈量止五十九里相隔甚近自撥宿布喇克至和爾博四十二里自和爾博至胡什木克又六十里道途遼遠特分為兩程自胡什木克至噶爾圖四

十里自鳴爾圖至滾諾爾四十八里雖有沙礫途  
近易到但此數程盡皆沙礫僕從人等俱著步行  
兵丁等有愛惜馬匹願步行者亦聽既皆步行仍  
令照常晨炊俟日出時起程可日食兩餐僕從人  
等若因步行怨望則朕亦即步行過此沙崗數處  
至平坦之地斯馬匹不必慮矣

臣謹按大軍遠征莫要于糧餉馬匹理應樽  
節愛惜以留餘裕惟我

皇上當糧餉豐足時即令每日一餐馬匹壯健時即令  
衆皆徒步人初以為難及時歷八旬軍食不  
致匱缺往返五千餘里馬力不致疲乏然後  
知

聖慮深遠衆皆莫測開闢以來懋建宏勲未有若此之  
盛者豈偶然哉

懋諭蘇尼特多羅郡王額駙薩瑪渣時薩瑪渣率領  
二等台吉渣卜等來

朝願從軍効力奉

旨自噶爾丹作亂爾等旗分信使往來供應驛馬食  
物顯著勞績朕豈忘之至秋間定行重賞爾回時  
可徧諭爾旗諸王下軍民人等諭畢薩瑪渣等免  
冠額額奏曰臣等係窮荒蒙古叨蒙

皇恩至有今日屢遭天災困厄之際幸荷

皇上頻加賑濟曲賜拯救此恩此德雖多方盡力豈能

報答馬匹糧餉又何足云今

聖駕親臨臣等雖步履匍匐亦願跟隨効力仰奉  
聖旨更無別言謹此謝

恩

上曰王既年邁又常足痛可免從征亦不必謝恩台吉  
渣卜垂渣卜蘇代納木渣卜畢立克等俱令隨征  
諭畢薩瑪渣等不勝欣忭仍陳奏謝

恩

甲戌

賜軍士牛以助輓稽滯車輛

上諭議政大臣等曰朕令皇長子留後將車輛盡皆趲出惟餘八輛無車夫亦無牲口著傳諭此八輛車主即赴皇長子處以牛賞之又

諭皇長子及內大臣馬思喀于滾諾爾地方察出車輛沉重牲口疲乏者賞挽車牛一百十頭

命酌留凱旋糧米

上諭議政大臣等曰朕回軍時必由此道今于成龍所

運米糧既留各站應將隨軍之一千三百輛車內  
所載米糧亦量留庫勒諾爾地方俟回軍時食用  
如此則目今前進之車輛既輕而回軍時取米亦  
易這留米之處將蒙古官軍酌量派出令其看守  
所留米袋各寫本人姓名及米數明白交與蒙古  
官兵議政大臣等將所留米數人名可察明交付

又

諭尚書班第曰凡坐塘之處俱各安放米三石運獨



石口所貯米十石分置第一第二第三驛自第四驛以前取于成龍運到之米每驛安放三石

皇太子奏報選馬備用奏曰恭請

父皇萬安欽遵

父皇諭旨解馬三千已于三月二十日發行外本月十

二日臣諭大學士阿蘭泰曰馬者大兵之急需若不飼秣預備倘倉猝用馬則不能解往應付應將上駟院馬匹酌取肥秣其太僕寺孳生馬

羣當如何取來令兵部飼秣可交議政大臣集  
議隨議云據問太僕寺少卿佛保言孳生馬羣  
共二萬九千餘匹內可騎之無孕牝馬及四歲  
馬駒可得二千許匹今方春時馬未蘇息往取  
至此則益瘦損飼秣之時不能立肥迨四月間  
青草既出馬已蘇息遣太僕寺賢能章京前去  
除此二千許匹外再儘數選出另為一羣于水  
草佳處小心肥秣再于八旗察哈爾人等分喂

馬匹中亦酌選其可騎者小心肥秣預備倘有  
取用即自牧養之地解往臣即令太僕寺少卿  
佛保前去揀選馬匹小心肥秣以備取用餘如  
所議緣秣馬事關重大謹具奏

聞得

旨深嘉許馬尋

皇太子又奏曰臣令牧羣侍衛常三同尚書馬齊內  
府大臣多璧會議據查上駟院定例御馬圈五

所甕山一館每館有聽用常馬二百匹南苑六館每館有常馬一百匹此內御馬園五所各馬一百四匹甕山館一百五十匹共留出六百七十匹其他俱于三月二十日起南苑放青自放青之日為始不支草料又查天津喂養十四大羣之馬挑出常馬兩羣共一千六十三匹此內除廢疾之馬合算廐中餘馬不足一千八百是以天津喂養十四大羣挑出常馬兩羣不令南

苑放青全取至此除廢疾外儘數入館喂養盡肥之後再奏請

旨得

旨所奏甚是大抵我師中不須復用馬矣不必待其以牧肥具報當不時察核之

皇太子又奏曰前者議政大臣以採買蒙古馬匹事具奏奉

旨出兵之後著留京大臣啓皇太子有願賣者聽其

收買不得抑勒頃欽遵會議查去年科爾沁和碩  
達爾漢親王額駙班第奏言今年兵丁馬匹俱  
乘坐出征應于來年五月間再買馬匹在上都  
等牧羣中肥秣備用等語科爾沁路遠往買馬  
匹必須時日應停採買至兩烏朱穆秦兩巴林  
克西克騰兩蒿齊特喀爾喀羅卜臧貝勒三吳  
喇忒毛明安等旗馬匹稀少已經停其採買科  
爾沁土謝圖親王沙津屬下五旗喀爾喀車陳

汗屬下旗分去年買馬竟無所得歸化城兩土  
默特兩喇喀沁兩翁牛特阿祿科爾沁兩扎魯  
特兩阿霸亥兩阿霸哈納爾兩蘇尼特四子部  
落教漢奈曼喀爾喀達爾漢親王諾內等旗買  
馬不能足額六鄂爾多斯等旗買馬足數今次  
應酌遣部院章京赴此項旗分共買馬二千或  
撥八旗蒙古驍騎叅領或賢能章京一同遣往  
與扎薩克王貝勒貝子協理台吉公視購買如

抑勒強買者事發治罪所用銀兩自戶部支取  
帶往所買馬匹各旗撥官兵趕解與去員一同  
押護前來到後兵部請

旨撥置臣已准其所請為此具奏

上曰兩喀喇沁兩土默特教漢柰曼數旗著停其採買  
其他旗分共買二千匹可也

乙亥

大將軍伯費揚古奏報自喀倫分兵兩路進剿



先是

上有旨諭費揚古大兵駐南口之日副都統阿玉璽至  
聞鑿井易成不勝喜悅如以爾軍到喀倫來報可  
量擬到翁金之日具奏再將到土喇之日詢喀爾  
喀熟諳鄉導開具地名按日計期來奏至是費揚  
古奏言臣等率領大兵于三月十三日至喀倫  
十四日將京城兵右衛兵分派十五日臣費揚  
古率京城兵及大同之綠旗兵于東路前進揚

威將軍覺羅恕書率右衛兵于西路前進細問  
鄉導等大槩分算程數計十八程于四月初三  
日至翁金二十一程于本月二十四日至土喇  
二十三程于二十七日至巴顏烏闌又據副都  
統馮國相報稱

皇上發來礮八位於三月初七日已到拖里胡地方臣  
等若等候則致遲悞遂留都統伊勒慎每旗派  
護軍叅領二員護軍一百名留在喀倫護礮作

速趕來俟至翁金時臣等另行奏

聞奏至

上命示議政大臣等議政大臣等閱畢奏大將軍費揚古所行甚善俟至翁金時再行奏

聞今無庸議奉

旨若至翁金再議則四月初三日始抵翁金比至翁金啟奏又須數日俟其時再議豈不遲悞著將應否守候車輛前行之處再議具奏議曰每兵各馬

四匹每四人令同住一處給騾一頭其米糧各物俱在此內並不致有悞凡此車輛原屬多帶若能趲至則令隨行若不能至亦即聽之不便等候衆人車輛仍應照常前行奉

旨不等候車輛甚是大軍照常前進俟至喀倫將應留之處再議又傳

旨撫遠大將軍費揚古奏西路兵于四月初三日至翁金二十四日至土喇二十七日至巴顏烏闌著

諭衆知之尋

諭費揚古曰爾至喀倫擬到翁金土喇日期之奏於  
三月十九日駐揆宿之清晨已到據云到土喇在  
四月二十四日但我師畧阻雨雪守候輜重雖急  
行斷不能在二十四日之前到土喇爾軍於三月  
十六日之雨或有停留可將日期另開註具奏如  
無停留則到翁金具奏之時另行奏明爾兵馬如  
何糧車已到何地聞寧夏兵聲息否以上諸事有

疏必奏

以塞外軍行情狀

諭皇太子

上諭皇太子曰朕今遠出歷覽蒙古地方與所聞迥異  
水草既佳樵蘇頗足馬矢雖濕塞外榆柳百草皆  
可焚燎喀倫以內水泉無庸疏鑿雖大兵一處同  
行水草柴薪斷然無悞但慮天氣無常時忽陰晦  
可為憂耳惟晴燥斯大幸矣出行以來間遇雨雪

數次而並無所苦青草既茁羊可飽食馬亦從此  
可與枯芨并秣惟祈

上天眷佑無雨無雪則可立奏膚功矣敬請

皇太后萬安朕躬及皇子諸王以至臣工軍士皆無恙皇

太子佳否

酌留凱還糧米于揆宿布喇克

上諭兵部理藩院曰所帶米糧與其載至庫勒諾爾地  
方留貯不若即留此處著每旗各派大臣一員部

院大臣一員章京一員並內府驍騎各三名謹視  
收貯俟收貯畢大臣等即作速前來著所派章京  
驍騎同蒙古兵丁謹慎看守兵部隨奏請派收貯  
米糧大臣得

旨著內大臣明珠散秩大臣博第蘇永祚侍郎戴通  
副都御史阿山留此收貯再將新滿洲侍衛派出  
十員令即刻伐取柳枝將所留之米下籍上覆周  
圍苫蓋謹慎收貯交與看守之人看守之章京驍



騎等各有所帶之米應無庸議其蒙古官兵應酌量給與米糧朕軍中尚有餘米著同大學士會議具奏隨議蒙古官兵二十四人每名給兩月口糧得

旨蒙古官兵不必帶行糧前來將此米加一倍給與著尚書班第從于成龍處領取分給又

諭領侍衛內大臣索額圖曰內大臣明珠散秩大臣博第蘇永祚等將所留米糧料理收貯畢著速行

前來留侍郎戴通副都御史阿山在彼處此路漢  
軍火器營兵有願留米糧者著戴通阿山料理收  
貯交付看守之人亦速行前來是日西路督運侍  
郎王國昌等奏至言西路大兵五十日口糧已撥  
湖灘河朔倉米分為六隊于二月二十六日陸  
續起行

丙子

上駐蹕和爾博

命趣中路兵前進

上諭議政大臣等曰前曾著前鋒兵綠旗兵在察罕諾爾地方等候今大將軍伯費揚古兵業已前進若大兵到時始行起程則遲悞日期矣現今古北口綠旗兵在昂幾爾圖地方彼等皆有車輛若不令前進俟大兵到時始令起程則大兵又致稽留爾等其集議具奏議曰

上諭極是大兵行程不為甚緩前鋒兵綠旗兵俱宜在

前行走應即遣人諭令乘便先行奏入奉

旨既云應令前行其作何前行並應隔幾程行走至  
何處扎環營各兵於何處總會俱未向鄉導人訊  
明議及但云應令前行可乎著再議具奏議政大  
臣等又議前鋒兵綠旗兵不必在察罕諾爾地  
方等候著古北口綠旗兵現在昂幾爾圖地方  
者酌量趲赴在前之綠旗兵其兩黃旗兵到察  
罕諾爾時令越過在前行走已經奉

旨應從察罕諾爾即扎環營問鄉導萬舒克云至克  
魯倫河俱可兩旗並行今仍著兩旗並行前鋒  
兵距綠旗兵察哈爾兵兩日程前行綠旗兵察  
哈爾兵距兩黃旗兵一日程前行在

御營後之兵亦照此行走俟出喀倫時將各兵總會於  
何處及前鋒如何行走之處再題請

旨奉

旨前鋒兵著距綠旗兵察哈爾兵一日程行走餘依

議

丁丑

上駐蹕昂幾爾圖侍衛馬武等甄別宣鎮兵復

命先是

上遣侍衛馬武侍郎阿爾拜察閱宣化府綠旗兵至是

還奏臣等出獨石口於十四日至和爾博地方

行及總兵官白斌之兵轉傳

上諭白斌言

聖明所聞甚確宣化府兵實屬不堪但此一千五百名  
兵經臣遴選其中雖有一二不堪用者然斷不  
至貽悞等語臣等觀張家口兵七百名甚優護  
送礮位兵百名看守礮位烏鎗兵三百名此四  
百名兵斷不可少惟宣化鎮標馬兵四百名內  
有一二不堪者然亦決不至貽悞因令總兵官  
白斌仍率所帶兵一千五百名前往察罕諾爾  
地方候

旨

命尚書班第前行設站

上諭議政大臣等曰尚書班第隨大兵後安站今若令其在前當於事有益著召班第來令於前途相距一宿地方安站又

諭兵部曰前途既設立驛站凡疲乏馬匹駱駝等物令皆於驛站留養爾部給以印文回時執文領取極為明晰不致遺悞仍傳示驛站人等若將所留



駝馬等物如數全交本人則自加體恤如慢不經心致馬匹倒斃則留於伊處何益前已有旨著再加曉諭又

諭領侍衛內大臣等曰馬匹關係最要今沿途既設立驛站凡馬匹及輓車牲口如有疲乏可俱留於驛站此時青草正發旋師時此等馬匹必皆肥壯如此則不致傷損大有裨益凡疲馬切不可輕棄將此通行明白曉諭

諭綠旗兵隨大軍後行

上諭領侍衛內大臣索額圖等曰今日在途見古北口綠旗兵車輛所載甚重又無相助之人若令伊等前行則其所馱載行李每日有我兵重載躡後行走甚難若留伊等在後則彼皆得親身幫助而行著會議具奏議政大臣等奏

上諭極是今應將古北口綠旗兵留

御營兵後視其力能行則隨所遇旗分在後行走如力

不能行則于漢軍火器營後行走宣化鎮綠旗  
兵若力能行走仍照常在前行走若力不能行  
亦留在

御營兵後同古北口綠旗兵一處行走可也奉

旨著馬武前往諭止

命總兵官馬進良押紅衣礮隨行

上諭曰昨會議宣化鎮兵令其得便先行已經行文今  
古北口兵現在胡什木克地方著令駐扎等候自

宣化府所帶紅衣礮二十四位著交付總兵官馬  
進良隨大兵後行

戊寅

上諭曰今日所駐胡什木克地方止二十二里沙磧亦  
畧減各人車輛到時將馬匹于好草處放牧飲水  
休息牲口再行前進著傳諭知之

命尚書庫勒納查核驛站

上諭議政大臣等曰此番前來官兵皆係情願効力之

人曾云應用物件豫備充足務期成功兵丁每名  
部給肥馬四匹今或將疲瘦牲口兩匹牽挽車輛  
且於米糧之外裝載各物或有載鷄鶩等物者朕  
以成功為念鷄鶩等物尚不攜帶又將疲馬留于  
驛站喂養屢經傳諭並嚴諭驛站人等今見疲瘦  
之馬並無一匹留于驛站雖極瘦仍帶之而行此  
等馬匹若皆留養目前現有青草自然得肥回時  
可以得力若帶往前去則徒然倒斃且或有馬匹

已斃將僕從人不留置驛站攜帶前往者此不過  
耗費米糧而已又何益乎今著領侍衛內大臣內  
務府總管護軍統領副都統夸蘭大等嚴行稽察  
將兵丁疲乏馬匹交與驛站喂養部給四匹馬內  
若有疲乏二三匹者雖携去無益察明即並本身  
留于驛站將伊臆壯之馬別給與人其瘦馬仍留  
與本人令于青草處牧放肥壯等候旋師其察核  
沿途驛站馬匹并存留牲口米糧等物俱係緊要

著派在京尚書庫勒納自備馬匹前來自存留米糧馬匹之驛站以至喀倫令其往來稽查如此則于事大有裨益將此曉諭在後夸蘭大等知之

諭皇太子塞外情形

上諭皇太子曰朕躬安皇太子佳否皇子及臣工軍士皆無恙但雨雪雖不甚急亦不甚間斷朕心為此稍覺憂勞蒙古居此者喜云吾土歷年亢旱草不萌生窮困已極皇上駕臨始有雨雪草皆茂盛觀

此則行路之人與居家之人其情大不相侔矣未  
知京師何如此間之草羊可飽食馬於沙際雜枯  
芟而食尚不得飽草色大槩漸佳水泉給用朕所  
經歷雖盡與大兵偕行亦可無悞薪燎具足後此  
則未之知也

己卯

上仍駐蹕胡什木克

上諭曰問之鄉導據云察罕諾爾地方形勢藏蓄地寬



草美凡應留牲口其能至察罕諾爾者令至彼處  
再留其必不能至者即留于此處可通行曉諭

庚辰

駕駐噶爾圖

辛巳

上仍駐蹕噶爾圖

諭領侍衛內大臣等曰今日寒冷各將瘦馬置帳房  
內以所帶餘米飼之亦為有益人尚可無恙也著

諭衆知之

命大學士伊桑阿致祭風雨及口外山川之神文曰  
茲因厄魯特噶爾丹逆天梗化擾亂邊徼朕統  
率六軍聲罪致討親蒞塞外以期蕩寇安民必  
賴山川效靈風雨咸若始于師行克有攸濟比  
日以來雨雪間作節候未調恐稽征邁朕心夙  
夜靡寧惟

神默贊撻伐之遠圖益助羣情之豫順俾時和氣協

早滌邊塵軍事有裨

神功聿懋是用特遣專官虔申告祭

神其鑒之先是數日風雪時作致祭後風止雪霽天氣日漸融和矣

壬午

駕至滾諾爾

命留疲馬牧于郭和蘇台察罕諾爾地方

上諭領侍衛內大臣等曰明日駐宿處草甚豐美凡瘦

馬俱著留牧彼地

癸未

上駐蹕郭和蘇台察罕諾爾

命蒙古監牧

上諭理藩院曰所留牧放馬匹甚屬緊要凡水草俱美之地蒙古知之甚悉其牧放看守俱交與蒙古所留喀倫之馬已交阿霸垓吳爾占噶喇布王此處所留馬匹著交與該王所屬脩路都統奇塔忒至

所留跟役伊主不必給米俟在後于成龍等米車  
運到酌量撥給

甲申

駕至胡魯蘇台

諭鄉導護軍統領托倫曰今日天陰或恐有雨馬匹  
俱勿解鞍應苦蓋者加意苦蓋

嚴蒙古盜馬罪先是

上命領侍衛內大臣馬思喀查郭和蘇台地方驛站存

留馬匹牲口僕從數目具奏至是馬思喀查明  
奏言阿霸垓卓禮克圖王之都統奇塔忒等云  
此所留馬匹牲口既交與我等即派本旗驍騎  
八十名看守查現在所留馬匹牲口計一千四  
百有餘在後兵丁如有再留馬匹牲口者則共  
至二千矣交與八十名驍騎看守似屬不足若  
將三百匹分為一羣可作七羣每羣計驍騎二  
十名則用一百四十名除此八十名驍騎外應

增蘇尼特之薩瑪渣王阿霸垓之吳爾占噶喇  
布王兩阿霸哈納爾兩蒿齊忒此六旗每旗派  
章京一員驍騎十名擇好水草處謹慎放牧看  
守仍交與奇塔忒等又大兵馬匹已留與驛站  
恐有賊盜妄行倘被拿獲時當作何嚴行治罪  
之處請

旨遵行奉

旨被獲賊盜著拿候餘如議

遣員外郎雅圖宣

諭督運于成龍

諭雅圖曰朕以糧運事務緊急特命侍讀學士喇錫  
馳召于成龍面有指授今思車上所載太重恐難  
速行又命爾雅圖傳諭于成龍爾既見于成龍令  
彼將多帶之米數千石酌留所過驛中交蒙古官  
兵看守其米既減車上遂輕其行可無悞矣俟至  
喀倫再將正額米留一千石其車上退出牲口即



聽于成龍調用出喀倫後倘有用米之處朕即遣  
官催來倘無用米之處亦遣官止之

乙酉

上仍駐蹕胡魯蘇台

申定行軍隊伍


上諭議政大臣等曰兩黃旗已行在後六旗著每三旗  
結隊而行火器營陸續進發

領侍衛內大臣公福善奏報漢軍火器營兵雪

阻情事先是

上諭福善爾留庫勒諾爾地方收貯出古北口王以下  
及官兵所帶餘米至是福善奏言臣於二十四日  
將滿洲四旗米已經收貯二十五日漢軍都統李  
正宗諾穆圖等咨稱沿途雨雪交作泥濘難行十  
九日派出官員兵丁我等親視脩道礮位火藥車  
輜僅能運過現今派夫搭橋修道等語據此奏  
聞奏至

上命示議政大臣



聖祖仁皇帝親征平定朔漠方畧卷二十一